



SAKSPAPIR

Saksnr	Utval	Type	Dato
24/2021	Formannskap/plan- og økonomiutvalet	PS	09.03.2021
17/2021	Kommunestyret	PS	23.03.2021

Sakshandsamar	Arkiv	ArkivsakID
Lin Tove Thomassen	FA-X01, TI-&00	21/244

FLAGGREGLEMENT I VAKSDAL KOMMUNE

Vedlegg:

Flaggreglement i Vaksdal kommune

Kommunedirektøren sitt framlegg til vedtak:

«Flaggreglement for Vaksdal kommune» vert vedteken slik det ligg føre.

Tilleggsforslag lagt inn i møteportalen av ordførar:

Administrasjonen får fullmakt til å gjera redaksjonelle endringar for å tilpassa ordlyden i vedtaket til reglementet.

Endringsforslag lagt inn i møteportalen av Ståle Kallestad Hesjedal:

Punkt 5: Vaksdal kommune flaggar med regnbogeflagget på Pridedagen. Dato for flagging skal vera andre måndag i juni kvart år.

Formannskap/plan- og økonomiutvalet - Sak 24/2021

FPØ - Behandling:

På vegne av Arbeidarpartiet la Heidi Rongved, Ap fram følgjande tilleggsforslag:

Vaksdal kommune flaggar 8. mars.

På vegne av Høgre, Sp, SV la Amalie Johnsen Lunde, H fram følgjande tilleggsforslag:

Det skal flaggast på skulane ved:

- e) Pridedagen
- f) Kvinnedagen (når den er på ein vekedag)
- g) Samefolkets dag (når den er på ein vekedag)

Vidare la Amalie Johnsen Lunde, H fram følgjande endringsforslag på vegne av Høgre, SV og Sp:

Punkt 5: Vaksdal kommune flaggar med regnbogeflagget på Pridedagen. Dato for flagging skal vere ein vekedag andre veka i juni kvart år.

Punkt 4: Vaksdal kommune flaggar med Sameflagget på samefolkets dag.

Formannskapet drøfta saka.

Amalie Johnsen Lunde, H la fram endring på tidlegare forslag:

Først:

Det skal flaggast på skulane ved:

- e) Pridedagen
- f) Kvinnedagen
- g) Samefolkets dag

Deretter:

Det skal flaggast på skulane ved:

- e) Pridedagen
- f) Kvinnedagen
- g) Samefolkets dag (når det er ein vekedag)

Thor Andresen, Ap, la fram eit tilleggsforslag, endring i tekst, til punkt 7 i reglementet:

Kommunedirektør/**ordfører**

Amalie Johnsen Lunde, H, la fram eit tilleggsforslag:

Det skal flaggast på institusjonane ved:

- e) Kvinnedagen

På vegne av Høgre, SV og Sp, la Amalie Johnsen Lunde fram følgjande endring på tidlegare framlagd tilleggsforslag:

Punkt 5: Vaksdal kommune flaggar med regnbogeflagget på Pridedagen. Dato for flagging skal vere måndag andre veka i juni kvart år.

Røysting:

Kommunedirektøren sitt framlegg til vedtak vart samrøystes vedteke.

Arbeidarpartiet sitt framlegg til vedtak om å røyste 8. mars vart samrøystes vedteke.

Endringsforslaget til punkt 4 i reglementet vart samrøystes vedteke

Amalie Johnsen Lunde, Ap sitt siste tilleggsforslag til punkt 3.2, e f og g vart samrøystes vedteke.

Tekstendringsforslag/tilføring frå AP vart samrøystes vedteke.

Tilleggsforslaget som omhandlar flagging på institusjon på kvinnedagen, vart trekt, og det vart lagt fram nytt forslag frå formannskapet:

Kvinnedagen 8. mars er å sjå på som offentleg flaggdag i Vaksdal kommune. Forslaget vart samrøystes vedteke.

Tilleggsforslag til punkt 5 vart samrøystes vedteke

FPØ - Tilråding/Vedtak:

Formannskapet si innstilling til kommunestyret:

«Flaggreglement for Vaksdal kommune» vert vedteken slik det ligg føre.

Med følgjande tillegg/endingar:

Vaksdal kommune flaggar 8. mars.

Punkt 4: Vaksdal kommune flaggar med Sameflagget på samefolkets dag.

Punkt 3.2: Det skal flaggast på skulane ved:

e) Pridedagen

f) Kvinnedagen

g) Samefolkets dag (når det er ein vekedag)

Tilføring til punkt 7: kommunedirektør/**ordfører**

Punkt 5: Vaksdal kommune flaggar med regnbogeflagget på Pridedagen. Dato for flagging skal vere måndag andre veka i juni kvart år.

Kvinnedagen 8. mars er å sjå på som offentleg flaggdag i Vaksdal kommune

Kommunestyret - Sak 17/2021

KOM - Behandling:

Tilleggsframlegg frå ordførar:

Administrasjonen får fullmakt til å gjera redaksjonelle endringar for å tilpassa ordlyden i vedtaket til reglementet.

Endringsframlegg frå Ståle Kallestad Hesjedal, AP:

Punkt 5: Vaksdal kommune flaggar med regnbogeflagget på Pridedagen. Dato for flagging skal vera andre måndag i juni kvart år.

Røysting:

Det vart først røysta over formannskapet si innstilling, som vart samrøystes vedteken.

Ståle Kallestad Hesjedal sitt endringsframlegg vart samrøystes vedteke.

Ordførar sitt tilleggsframlegg vart samrøystes vedteke.

KOM - Tilråding/Vedtak:

«Flaggreglement for Vaksdal kommune» vert vedteken slik det ligg føre, med følgjande tillegg/endringar:

Vaksdal kommune flaggar 8. mars.

Punkt 4: Vaksdal kommune flaggar med Sameflagget på samefolkets dag.

Punkt 3.2: Det skal flaggast på skulane ved:

e) Pridedagen

f) Kvinnedagen

g) Samefolkets dag (når det er ein vekedag)

Tilføring til punkt 7: kommunedirektør/**ordfører**

Punkt 5: Vaksdal kommune flaggar med regnbogeflagget på Pridedagen. Dato for flagging skal vera andre måndag i juni kvart år.

Kvinnedagen 8. mars er å sjå på som offentleg flaggdag i Vaksdal kommune

Administrasjonen får fullmakt til å gjera redaksjonelle endringar for å tilpassa ordlyden i vedtaket til reglementet.

Saksopplysningar:

Samandrag/konklusjon (kort om saka)

Kommunedirektøren ser behov for å få på plass eit enkelt reglement for bruk av flagg på offentlege flaggstenger ved kommunale bygningar i Vaksdal kommune. Reglementet er bygd på lovverk knytt til flagging og vil ivareta flagging under offisielle flaggdagar, samt for einskilde andre markeringar.

Bakgrunn for saka

Vaksdal kommune føl i dag [Forskrift om bruk av flagg](#) si uttømmende liste over offisielle flaggdagar og flaggar utanfor Heradshuset, skular og institusjonar. Sjølv om krav om flagging ved offisielle flaggdagar gjeld statlege verksemdar, ønskjer kommunedirektøren at det skal flaggast i tråd med desse føringane så langt det legg seg gjere, men utan at ein bind opp for mykje ressursar. Kommunar kan i slike situasjonar vedta eige reglement for flagging både ved dei offisielle flaggdagane og for andre markeringar. Til dømes [Voss herad sitt reglement](#) for flagging opnar mellom anna for markering av Kvinnedagen og Nordens dag.

[Lov om flagging på kommunale bygg](#) med [forskrift](#) legg føringar for kva flagg som kan nyttast og for arrangement. I 2020 sendte Kommunal- og moderniseringsdepartementet (KMD) [eit høyringsnotat om endring av lov om flagging på kommunane sine offentlege bygningar](#). Her vert det foreslått at kommunane i større grad sjølv kan avgjere kva flagg ein skal kunna flagge med frå sine bygningar. KMD har også eit forslag om å endre lova slik at det også kan flaggast sjølv om det ikkje vert gjennomført eit arrangement rundt bygningen. Lovproposisjonen er ikkje ferdighandsama. Kommunalavdelinga har meldt tilbake at dei per 19.02.21, ikkje kan seie noko om status for det

vidare arbeidet.

Offisielle flaggdagar

Kommunalteknisk drift i Vaksdal kommune har det overordna ansvaret for flagging ved kommunale bygg. Dei syter før at det vert flagga frå alle kommunale bygg i kommunen ved dei offisielle flaggdagane.

Utanfor Heradshuset vert det ved eit særskild tilfelle gjort unntak frå flagging ved ein offentleg flaggdag. Dette gjeld når det er gravferd i Dale kyrkje same dag. Kyrkja er ansvarleg for å flagge under gravferder frå sine stenger. Stanga utanfor Heradshuset vert ikkje nytta av kyrkja. Etter tilbakemeldingar frå sørgande om at dei ikkje ønskjer å sjå eit fullheist flagg når dei kjem ut kyrkjedøra, har kommunalteknisk drift valt å ikkje flagge utanfor Heradshuset. På den andre sida har avdelinga fått negative tilbakemeldingar om ei tom flaggstang på ein offisiell flaggdag. Slike situasjonar oppstår berre unntaksvis, men når det oppstår har avdelinga valt å ta omsyn til dei sørgande og ikkje dei som etterlyser flagging.

Særskilt flaggmarkeringar ved Daletunet og Vaksdal sjukeheim

Ved Daletunet og Vaksdal sjukeheim vert det flagga ved gravferder for bebuarane. Dei flaggar også ved spesielle fødselsdagsmarkeringar for bebuarane på institusjonane. Dette gjeld runde dagar og kvart år etter fylte 90. I tillegg vert det flagga ved halvrunde dagar på Daletunet. Markeringa gjeld dei som bur på institusjonen. Avdelingsleiar ved Daletunet har fått spørsmål om dei ikkje burde ha markert fødselsdagen til dei som bur i tilknytning til institusjonen også, men ser at det vert for vanskeleg og tidkrevjande å følgje opp.

Særskilt flaggmarkeringar ved skulane

Rektorane ved skulane flaggar ved markering av første skuledag. Dei to skulane som også inkluderer ungdomsskule, flaggar ved avslutningsmarkeringa for 10. trinn. Ved konfirmasjon vert det flagga ved Heradshuset og skulane på Vaksdal, Stanghelle, Stamnes og Eksingedalen. Lokale tilhøve gjer at det vert flagga litt ulikt av dei ulike rektorane. Til dømes ved Eksingedalen skule vil det vere naturleg å flagge dersom forsamlingshuset vert nytta under ei gravferd.

Andre flaggmarkeringar ved Heradshuset

Ved Heradshuset har det dei to siste åra vorte flagga under markering av Pride. Formannskap, plan- og økonomiutvalet vedtok i [møte 29.05.19](#) ei prøveordning med å flagge utanfor Heradshuset 28. juni. Året etter vart det også flagga, men ikkje same dag.

Historia for markeringa starta 28. juni 1969 då det skeive miljøet knytt til baren Stonewall fekk nok av vald og trakassering og gjorde opprør. No vert juni rekna som den internasjonale pride-månaden. Arrangementa er ei markering av skeiv kjærleik og mangfald og vert arrangert til ulike tidspunkt rundt om i landet. Arrangementa vert gjerne kalla regnbogedagane og kan strekke seg over fleire dagar. Under Pridedagane vert det arrangert ein parade og det er gjerne denne dagen kommunar markerer med flaggheising. Bergen kommune fekk til dømes ei oppmoding frå sine lokale arrangørar om å flagge 27. juni i 2020.

Vurdering og konsekvensar

Vaksdal kommune er stor i areal, men liten når ein ser på folketalet. Kommunalteknisk drift har begrensa med ressursar tilgjengeleg og ei innføring av eit flaggreglement har ikkje som mål å gje avdelinga fleire oppgåver enn i dag. Det same gjeld for avdelingsleiarane og rektorane. Reglementet vedlagd saka speglar den ordninga vi har i dag. Vaksdal kommune flaggar når det er offisielle flaggdagar og i andre særskilde samanhengar. I tillegg ønskjer kommunedirektøren at avdelingsleiarar og rektorar kan nytte skjønn og vurdere behov for flagging når dei ser det naudsynt etter skikk og bruk.

Vi ser utfordringa når det gjeld ei tom flaggstong utanfor Heradshuset på offisielle flaggdagar på grunn av ei gravferd ved Dale kyrkje. Lovverket opnar for at ei kommunal flaggstong kan stå tom. Slik situasjonen er no, vil det vere fornuftig å fortsetje ordninga slik den vert gjennomført i dag av avdelinga. Dette er ført inn i reglementet.

Vaksdal kommune flaggar med det norske handelsflagget. Vi har ei eiga [forskrift](#) for utforming av kommuneflagg, men dette flagget vert per i dag ikkje nytta.

Tilbakemeldingar frå dei folkevalde er at dei ønskjer at Vaksdal kommune skal markere pridedagen. Det har også blitt gjort dei siste to åra. Med atterhald om at lovproposisjonen opnar for at ein kan flagga sjølv om det ikkje er arrangement knytt til Heradshuset, tilrår kommunedirektøren at det vert flagga med regnbogeflagget utanfor Heradshuset. Sidan dato for parade varierer, bør det ikkje setjast ein fast årleg dag for markeringa.

Samefolket sin dag er oppført som ein offisiell flaggdag. Fram til no har vi markert dagen med det norske flagget. Kommunedirektøren meiner ein bør flagga med det samiske flagget ved Heradshuset.

Kommunedirektøren tilrår at vedlagte reglement vert godkjent av kommunestyret.